

大清世宗憲皇帝實錄



大清世宗敬天昌運建中表正文武英明寬仁
信毅大孝至誠憲皇帝實錄卷之五十七

監修總裁官光祿大夫經筵講官太保議政大臣保和殿大學士兼兵部尚書總理兵部事三等伯加十五級臣鄂爾泰

總裁官光祿大夫經筵日講官起居注太保兼太子太保保和殿大學士兼戶部尚書仍兼管吏部尚書翰林院掌院

事三等伯加十三級臣張廷玉光祿大夫經筵日講官起居注太保議政大臣武英殿大學士兼工部尚書仍兼管

翰林院掌院事加二級臣福敏光祿大夫經筵講官太子太保東閣大學士兼禮部尚書加六級臣徐本光祿大夫

經筵講官議政大臣協辦內閣大學士事務禮部尚書仍兼管太常寺鴻臚寺事臣三泰等奉

敕修

雍正五年丁未五月丙辰朔陞鑲白旗蒙古

副都統塔拉圖。爲正藍旗護軍統領。○戊午。孝誠仁皇后忌辰。遣官祭。

景陵。○調正白旗滿洲都統拉錫。爲鑲白旗滿洲都統。以正藍旗滿洲副都統多賽。署鑲黃旗蒙古都統。○己未。夏至。祭。

地於

方澤。遣康親王崇安行禮。○諭內閣。前織造等衙門。貢獻物件。所進御用繡線黃龍袍。曾至大九件之多。又燈幃之上。有加以綵繡爲飾者。

朕心深爲不悅。即降旨誡諭。近因端陽令節。外間所進香囊宮扇中。有裝飾華麗。雕刻精工者。此皆開風俗奢侈之端。朕所深惡而不取也。向來外省諸臣。凡有進獻方物。朕每頒賜諸王內外大臣。如黃龍繡緞之類。既不可以頒賜。不過收貯於宮中耳。其餘華燦之物。在朕用之。心中尚覺不安。若賜諸王大臣。在伊等亦覺非分。豈非費於無益之地乎。況朕素性實不喜華靡。一切器具。惟以雅潔適用。

爲貴。此朕搏節愛惜之心。本出自然。竝非勉強。數十年如一日者。凡外臣進獻。惟應量加工價。少異於市肆之物。即可見恭敬之忱。何必過於工巧。人情喜新好異。無所底止。見一美麗式樣。初則競相慕效。後必出奇鬪勝。此雕文纂組。古人所以斥爲奇袤。豈可導使爲之。而不防其漸乎。蓋治天下之道。莫要於厚風俗。而厚風俗之道。必當崇儉而去奢。若諸臣以奢爲尚。又何以訓民儉乎。朕觀四民之

業。士之外農爲最貴。凡士工商賈皆賴食於農。以故農爲天下之本務。而工賈皆其末也。今若於器用服玩爭尚華巧。必將多用工匠。市肆中多一工作之人。則田畝中少一耕稼之人。且愚民見工匠之利多於力田。必羣趨而爲工。羣趨爲工。則物之製造者必多。物多則售賣不易。必致壅滯而價賤。是逐末之人多。不但有害於農。而竝有害於工也。小民舍輕利而趨重利。故逐末易而務本難。苟遽然

繩之以法。必非其情之所願。而勢有所難行。惟在平日留心勸導。使民知本業之爲貴。崇尚樸實。不爲華巧。如此日積月累。遂成風俗。雖不必使爲工者盡歸於農。然可免爲農者相率而趨於工矣。至如士人所業。在乎讀書明理。以爲世用。故居四民之首。然父兄之教子弟。亦當觀其才質如何。若果穎悟恂謹。可望有成。則當使之就學而爲士。若愚濁中下之資。讀書難通。即當早令改業。使盡力於南

畝。誠恐讀書不成。而又粗識數字。曠廢閒遊。必致非分妄爲。越禮犯法。是浮慕讀書之名。而不得其道。其傷農而害本者。爲尤甚也。朕深揆人情物理之源。知奢儉一端。關係民生風俗者至大。故欲中外臣民。黜奢賤末。專力於本。人人自厚其生。自正其德。則天下共享太平之樂矣。朕自身體力行。爲天下先。諸王內外大臣。文武官弁。與鄉紳富戶。當深體朕心。欽遵朕諭。期共勉之。○諭吏部。庶吉士陳

浩等教習已久。今加考試。應分別授職。除編修王安國。已經授職外。清書庶吉士陳浩。趙晃。嚴源。劉統。勲。黃祐。俱著授爲編修。劉統勲。著在南書房行走。漢書庶吉士吳應枚。汪由敦。王峻。吳龍應。蔣振鷺。李清植。趙大鯨。于枋。朱良裘。吳兆雯。開泰。楊士鑑。徐煥然。吳延熙。顧贄。熊暉吉。俱著授爲編修。張若涵。程光鉅。俱著授爲檢討。徐天麒。以部屬用。諸錦。周廷燮。陳璟。歸進士原班用。舒明。著再教習三

○年。庚申。諭內閣。朕覽治河方畧。見原任河道總督靳輔。昔年修理河工。勞績茂著。欲加恩澤。以獎勲庸。據該部查奏。靳輔於康熙四十六年。已蒙

聖祖仁皇帝加贈宮保。給與世職。今著追贈工部尚書銜。予祭一次。以示朕篤念前勞至意。○辛酉。諭內閣。今科選拔庶常。應如何簡選考試。務得人材。以濟實用。爾等會議具奏。尋議進士選拔庶常。原屬儲才大典。必得學問

素優才品兼著之士。方可選列清華。查雍正元年癸卯科。殿試後集諸進士於保和殿。

御試。並令九卿各舉所知。雍正二年甲辰科。照前舉行。今科進士亦應詳加考試。仍令內閣九卿確行保舉。其考試擬用論詔奏議詩四題。或作一二篇。或諸體全構。聽其各展所長。屆期欽點大臣閱卷進呈。其進士內有彼此熟悉。素爲衆所推服者。亦令公同舉出。伏候皇上親加選定。從之。○以戶部左侍郎常壽署

禮部右侍郎○壬戌議政王大臣等議覆署
黑龍江將軍公傅爾丹奏言。墨爾根城舊有
額兵九百名。竝無鎗礮船隻。請添置漢軍二
佐領。挑選兵一百名。設佐領二員。驍騎校二
員。合前兵共一千名。照例添設鎗礮船隻。令
其操演。應如所請。從之。○內閣等衙門議奏
查嗣庭蒙恩擢用。歷官至禮部侍郎。陰懷二
心。忍行橫議。臣等謹將查嗣庭所著日記。悖
逆不道大罪。竝黃緣請託關節私書。逐款究

審。嗣庭亦俯首甘誅。無能置喙。除各輕罪不
議外。應照大逆律。凌遲處死。今已在監病故。
應戮屍梟示。查嗣庭之兄查慎行。查嗣璫。子
查灝。姪查克念。查基。應斬立決。查嗣庭之子
查克上。在監病故。次子查長椿。查大梁。查克
纘。姪查開。查學。俱年十五以下。應給功臣之
家爲奴。所有財產。查明入官。得旨。查嗣庭。著
戮屍梟示。伊子查灝。改爲應斬監候。查慎行
年已老邁。且家居日久。南北相隔路遠。查嗣

庭所爲惡亂之事。伊實無由得知。著將查慎
行父子俱從寬免。釋放回籍。查嗣庭之胞兄
查嗣璫。胞姪查基。俱免死流三千里。案內擬
給功臣之家爲奴各犯。亦著流三千里。其應
行拏解之犯。該撫查明。一併發遣。查嗣庭名
下應追家產。著變價留於浙江。以充海塘工
程之用。○癸亥。輔國公阿布蘭。緣罪革爵封
其姪法爾善爲輔國公。○以正白旗滿洲副
都統博第。協理正白旗漢軍都統事務。○甲

子。宗人府叅奏。滿都護隱匿

聖祖仁皇帝硃批諭旨。應革去公爵。得旨。滿都
護係朕親叔恭親王之子。是以朕即位時。任
以要職。伊自委用之後。總不肯實心爲國家
出力。惟戀戀於阿其那。蘇努。保泰等黨。與甘
爲犬馬。不孝不忠。伊弟海山。人甚狂悖。海山
之子倫布。

聖祖仁皇帝望其成人。令隨乾清門御前侍衛
處行走。及

皇考升遐。伊竟無滴淚。朕見其如此忘恩。實爲痛恨。故令於伊父海山處拘禁。滿都護之弟對青額庸劣無耻。在侍衛班中飲酒沉醉。竟在中和殿階上溲溺。滿都護隱匿不叅。及朕聞知。止於革退。亦未將伊究治也。海山任貝勒時。滿都護任伊陵辱。隱忍不露。而暗將海山謀陷中傷。糾伊黨與。極力排擠。其姦詐處。朕知之最悉。雖時加訓誨。伊竝不感恩改悔。而於其黨與。則甘心出其胯下。伊大罪甚多。

不勝枚舉。因伊尚無子嗣。彼兄弟子姪中。又無可以襲封之人。是以朕俱寬免。今未交硃批之事。以伊身所犯之罪較論之。此猶其小者耳。若將滿都護革去公爵。則恭親王子孫承襲無人。滿都護雖不念其父。朕豈不念朕叔父乎。著從寬免革公爵。俟伊改悔。○調福建汀州總兵官陳祖訓。爲廣東南澳總兵官。廣東左翼總兵官朱杰。爲福建汀州總兵官。福建金門總兵官謝希賢。爲廣東左翼總兵